

也日見職部窮蹙之極合詞五請帑金未蒙
允發職竊懼然懼且疑也以

皇上聰明天縱靜覽章疏試思此二百萬者能足
此各項之分用否除此加派之外職部更有
何錢糧可爲接濟否如此則舍乞恩于發帑
無策矣若職部稍有一毛贏餘可爲設處豈
以發帑二字爲

皇上所厭聞者而職等敢冒
天威而爲是瀆請耶

皇上又試思職等今日瀆請果爲職等私情乎爲
皇上疆場乎近者遼左之間經臣整飭惟新人有
固志所恃者兵兵所恃者餉耳在禦侮者不
能以枵腹使衆在持籌者不能以點鐵成金
萬一遼餉不繼奴酋再逞則遼陽危而內地
亦危各鎮之糧不繼軍伍脫巾則內地先遼
陽而危咫尺神京彼時縱欲發帑而且無及
則亦何怪此紅蠹金錢而泄泄以貽莫大之
患也至于職陞辭以來屢疏所陳無當採擇

截漕一節五月上疏六月覆請俱不得
旨方以便宜行留時已臨秋倉卒括舟完此一運
而芙蓉岬峨等島偶遭東省異風在後發者
幸抵遼地而先發者及泊島岸明春之舟更
爲難具其請造淮船一節自職叨撫東省屢
請至今未一得

旨茲職不獲已差經歷程惟守主簿徐弘諫二卑
官以往尚不知能造如數否職先令武生梁
聘材催募沙船止報得五十隻亦未給以見

銀日來淮上條議海運者有人寧前海葢二
道呈報習行北岸者有人職又行海防叅將
錢世禎募南中慣知海上風雲者若而人但
皆以空文劄取之未可必來卽來也其天津
芝蔴灣各處造船所費不貲關之內外須加
倍添車海葢一道接受各處之運拮据尤難
糝括無牛必須買之內地凡此數者行之省
直地方未免煩攘第事勢至此救焚拯溺不
得不爾若非多發金錢何以足用若非嚴奉

明旨何以責成職欲多請之也則二百萬之數職部止此多用于本懼不足于折職不多請之也則舟車之費從何出辦俱不足于本中夜躊躇計畫無復惟有束手長嘆而已伏乞皇上翻然軫念二百萬加派之數原不足遼左之支持允發帑金百萬以濟遼餉之急并勅戶兵二部從長計議一番務求兵食本折之額一一相符庶便料理

籌遼碩畫卷之三十二終

碩畫

三十二卷
三十四卷

臺灣國家圖書館, NATIONAL CENTRAL LIBRARY, TAIWAN. R.O.C.



籌遼碩畫卷之三十三

巳未仲冬一

天都程開祐仲秩父輯

○閱視吏科給事中姚宗文題為遵

旨出關謹據真確見聞再陳未議以祈

聖裁事職于本月二十一日抵山海關卽當馳驅

東去緣薊鎮真保等處閱視文移難于關外

轉發應在關料理而差往西虜通官夷丁員

役或宜此中調取及隨行材官家丁人等向

以出關之議未定行李不備今以關外苦寒

應爲體恤辦給不能數日就緒于次月初一日方能出關職四牡載道見畿輔騷動所在驛遞紛紛告勞懷詩人載藉之慮至關後與永平道袁應泰自關門至一片石匹馬周視歷覽形勢見城垣單薄兵衛更少又懷綢繆徹土之思謹以切要事宜列欵上請幸

皇上留神軍國省覽施行

一議防守看得山海關爲鎖鑰重地况今東方告急烽火時聞防盜者防之門戶間則易爲

力由山海而永平薊州以至通灣此門戶之漸深入者也職見山海關住城已多圯壞邊墻未爲高墉總加修築正此其時而往在都中時按臣王象恒見語惟以錢糧不易湊手爲慮今據道臣袁應泰詳議先修傾圯關城先築缺口先增敵臺先接羅城約費八萬三千八百有奇昨見撫臣劉日梧疏捐節省銀七千餘兩爲修築之費此外尚七萬餘兩在該部宜立時題覆以權爲目前修葺至于總

行修理費更十萬雖曰措處頗難然今日何時此爲何地今日費十萬金而不爲他日卽欲以百萬金錢圖保障之功而不可得也并宜多方設處以圖全効職在都中時止知山海關爲東來要路耳今來此中親至一片石地方見其外當東西夷虜之衝內通石門建門諸路止城牆一帶亦多圯壞思之大可寒心合于舊城之外山阜相連處增置敵臺三座其城墻圯壞不堪者亟會該道估計并加修築宿重爲衛庶幾緩急有賴伏乞

聖裁

一議添兵夫地雖設險非兵不守陰平劔閣不能止鄧艾之入前事可鑒也職前疏請自山海至通州得勝兵三萬足屏翰神京通州之兵在土著者可查可招可練職前疏已詳言之聽兵部議覆具題外其薊鎮東協等處原議招兵五千永平道臣表應泰標下新兵三千悉心訓練已漸整肅可觀山海關內外止

兵一千其二千各分派黃土嶺大毛山義院口等十一處兵散而力薄萬一有警勢不能支欲藉彼以援此恐鞭長之不及馬腹也今再添兵五六千以千名增之關內外以千餘增之一片石其餘視各路之緩急爲添兵之多寡問之該道云招兵止議糧餉而無安家之費亦易辦也今義院界嶺日報夷情集熊羆之師可無犬羊之慮伏乞

聖裁

一議海運夫從陸運糧率二鍾而致一石其艱難萬狀昨者登萊海運事半功倍遼左幸無脫巾之呼但潮海風濤隨時順逆放洋揚舩而撐駕占候者非海上長年誠難必布帆之無恙也自天津達山海路循海岸似差易爲力臺臣王象恒董元儒言其便督餉侍郎李長庚致書商畧意亦相符臣自望海樓直睇至芝蔴灣一衣帶耳去關門不過二十里如運船抵山海起陸出關至灣復舟運至旅順

風力之便不過一晝夜所不敢徑以運船越關出海者一則以傍巖有石開洋便險一則以船通海上關禁難稽起陸止二十里車馬人力轉運亦易聞督餉侍郎日且出關料理加造船合式更取江南水軍熟知風候者令其撐駕此足濟登萊運事之窮伏乞

聖裁

一請優恤畿輔臣奔走在途蒿日環顧見兵馬之絡繹運解之繽紛異常擾動民不堪命矣

前通州衛官幾欲盡逃以密雲道臣諭安性委曲安全甫能終事其餘郡邑驛遞皆蹙額相告上人多方幹濟稍能救目前之困而東事一日未寧則求一日之息肩未有期也職謂既用其力不得不念其生如添畝派等項在畿輔三協一帶斷宜寬免昨見民程登指牧地以重徵誣鄉紳以霸占不顧國家利害不念小民休戚尚欲腴獎獨之髓以供其漁獵之術也方今四海困窮徵求不應正緣此

輩言利召殃以生釁孽宜卽置之斧鑕其驛
遞中多應付不給似宜斟酌加以地方協濟
如再加之本地方以甦驛遞之苦是剜肉補
瘡之說也伏乞

聖裁

一請亟議糧餉職駐山海關數日見各援兵至
關者有河南毛兵有山東募兵其尚留關外
有湖廣土兵雖僅四千人而日糜糧餉已嗷
嗷矣况在遼左者已十餘萬而後此相繼出

關者尚未有定額也不預爲之計此輩能枵
腹荷戈否耶臣累疏言指處糧餉而計部未
聞定畫司官避怨所呈堂上請猶然考成舊
套耳嗟乎具疏伏

闕不能望九關之開而顧後瞻前不能忘一身
之慮慮誠周矣如燃眉無救而轉瞬卽亾誰
任誤國之咎乎職虛心再訪爭云稅契一節
所得不貲計部前已議及然章程慢而莫應
也宜行各省直撫按計其遠近定以限期督

令徵解其事例一項前見工部主事華顏有封典一欵此以廣

聖朝錫類之仁開天下榮親之念自文職貲郎以至武階盡人子也木本水源爭思自盡願者必多至于樂輸慕義豈曰無人勸典未彰後來却步如南京太僕寺少卿吳炯損資鉅萬不爲薄矣宜

勅令建坊表彰且官其子姪爲中書以旌慕義者或接踵而至矣職前疏請令經畧督餉二臣假以便宜自行搜括此宛結展轉之極思也倘于事理無礙亦濟變之策伏乞

聖裁

○遼東管餉郎中單崇題爲歷陳遼餉緊急之狀懇乞

皇上速發內帑以收拾殘局事竊照請發內帑一節計臣言之又不聽臣揣

皇上之意或者曰遼餉尚未到十分緊急地位若十分緊急則身官遼地何不言乃按臣言之

不聽撫臣言之又不聽臣揣

皇上之意或者曰遼餉猶未到十分緊急地位若十分緊急則親督遼餉者何不言臣向來非不言也近臣遠臣千言萬言言止矣無以復加矣豈諸臣不能得于

皇上臣輒欲以片言回天又豈臣明知不能得于皇上而僅欲以空言塞責蓋身所歷之光景目所擊之情形自不容默默已者臣二月到遼正當出口張皇數日不及記憶及三月內見兵

有自川西來者萬里跋涉瘠色如土短褐不完臣不覺爲之心感卽

皇上見之亦必心感四月內見兵有自關西來者未及造冊未及掛號輒擁門索餉口誅毗裂莫之敢撓臣不覺爲之心悸卽

皇上見之亦必心悸五月內幻言妖帖傳布街衢僉謂奴酋于端陽之日來遼陽坐殿一時將卒個個安排一死臣不覺爲之心痛卽

皇上見之亦必心痛六月內開原失守人心洶洶

復遣戍卒畏若湯火若非厚楮誰肯願出
命則月餉不得不議加卽

皇上見之亦必議加七月內鐵嶺攻陷兵力益單
河西額兵調守河東原領額餉不足供贍朝
夕則新餉不得不議找卽

皇上見之亦必議找八月內金白殘破瀋陽孤虛
軍丁逃竄若鳥驚魚亂經臣遂單騎北赴特
銀慰賞以安人心以鼓士氣此亦不得不議
賞者卽

皇上見之亦必議賞九月內聞奴酋筵宴諸夷欲
犯搶遼陽經臣親携牛酒在演武場逐名犒
賞臣追隨其間見其所饗牛酒帶有風塵而
各軍噉之如飴臣不覺潸然泪下卽

皇上見之亦必潸然泪下十月內聞奴酋以三千
精騎在清河堵口欲由撫順大路傾巢而來
經臣遂令將各卒四散設伏防守宵居露處
雪卧霜眠艱難困苦非人所堪經臣遂各賜
以綿衣卽

皇上見之亦必賜以綿衣諸如此狀何等迫切所需糧餉何等緊急况各省調募之兵目下雲集以擐甲荷戈之徒處寒沙冷月之地灶烟稍有斷續土崩必出非常凡此皆取辦于臣之堂官者堂官之搜括已窮加派已盡發之太倉者源源而未出之臣手者滔滔而去在天不肯湧金雨粟在臣不能唱籌量沙千想萬想惟靠之

皇上而已矣千難萬難惟靠之內帑而已矣伏祈皇上速發內帑數百萬急救遼東一塊土非直爲遼東也爲天下也非直爲天下也爲

皇上也天下

皇上之天下

皇上不愛惜臣子其奈之何內帑

皇上之內帑

皇上不頒發臣子其奈之何臣子一個沒奈何便無愧于臣子

皇上令人沒奈何實貽患于

皇上是在

皇上之自爲審處也義利二字

皇上豈不分明利害二字

皇上何反顛倒臣在餉言餉自應作此苦口耳至
于一切出納造報之數悉聽當事查覈固不
敢以清白末節詡詡于君父之前也

○浙江道監察御史劉蔚題爲邊事日急朝政日
疎懇乞

聖明白爲社稷至計以圖安攘事竊惟

皇上英明聖智何事不留心何事不聰察乃適因
朝講弗御人賢弗用政治弗修以致天怒人
怨釀成遼禍之慘奴酋以么麼小醜稱帝改
元屠我城堡戮我人民尅滅北關刦制西虜
河東已去半壁全遼岌岌垂危徵調遍于九
邊賦稅加于四海蓋中外騷動人神胥憤此
乾坤何等時乎尚可怠荒逸豫晝寢夜酣安
其危而利其災耶詩曰天之方蹶無然泄泄
此政其時矣燕雀處堂不知禍之將及斯葢

將及時矣今徵調四出中外震驚帑藏空虛糧餉不繼熊廷弼雖忠義敢勇而無米難炊脫巾可慮賊酋雖暫爲躡息而狡詐百出除夕元旦之際倘出不意而來尤爲可慮萬一遼陽失守水陸並進北碯薊鎮則薊門驚而陵京危東走登萊則東土驚而中原震

皇上卽有黃金千萬將安之乎况江南財藪連歲多遭水荒金陵重地兵食尚且不足則京師根本重地可不及時速爲綢繆計乎天下者

祖宗之天下也

二祖

八宗培養二百五十餘年深仁厚澤固可垂之萬世奈何一朝屑越忍同嬉戲也人才者天畀皇上以輔理成化者也

皇上誠不愛高爵厚祿以養賢才則賢才亦必不愛頂踵髮膚以冒報効

皇上誠思熊廷弼未用之先遼左如何景象朝野如何震驚廷弼旣用之後雖地方殘破收拾

艱難人情物色若似有更生也者則柰何不
思用賢之効隨推隨下更舉朝盡用以培植
之耶輔臣者

皇上之腹心也燮理陰陽調和元鼎任何如其重
而枚卜已久稽遲不下致令悠悠忽忽誤國
誤邊是尚可遲遲不決以再誤乎九卿大臣
皇上之股肱也部院各有專司猶股肱難以廢缺
今冢宰故矣宗伯無人左宗伯且以失意病
去矣司馬封印日久刑工院寺閭然無人倉

署兩乏何不速賜點用以肅紀綱六科印多
壓封豈可終于白抄以褻國體中臺備員未
發豈可不盡允用以壅諸差徐光啟慷慨談
兵可不速令整練以張威武蔣定國謾言開
礦可不速爲懲治以警奸邪至調募多兵近
集畿甸稍有不戢易生事端所謂營務糧賞
作何處置永平餉司近言止存二千之餉遼
東開美亦云止餘一月之糧况徵調者源源
而耒則轉輸者宜陳陳而集勢不能不徵調

則勢不能不轉輸戶兵二部宜何如其熟計
籌畫者可令呼庚而呼癸也然戶兵諸臣能
効于力之所及不能効于力之所不及搜括
派加權宜措置極設處之方塞洩漏之竇部
臣之力盡矣智能索而餉弗能繼偷天無門
點金無術將休兵乎將枵腹乎將任逆奴縱
橫而以遼陽與之乎與之遼陽而可以止其
不走薊鎮不渡登萊乎事無一可餉不能克
卽罷斥諸臣臣亦甘心而竟何益于國家也

則叩閭請帑明知逆耳而勢不得不請者

皇上聰明天縱揆事度理內帑之當發與否恐不
待職辭之畢矣至廷臣章奏關切時政苦心
極思之所出也邇年朝御稀聞籲天無術止
憑此章奏一脉以聯君臣之交必朝上夕下
斯有濟于時艱今隔絕不通十不一報誤事
日多又何禪于國計乎是所望虛衷延覽勿
貳勿疑俯體臣工以急救危亾者伏願

皇上自爲社稷至計亟用人以修內治發帑以詰

兵戎庶戰可勝守可圖恢復勦滅諒經臣必
能任之不然及今不晷日復一日政治日弛
人心日散兵餉不繼內變將興奴乘釁而復
未勢將叵測天下事益有大不忍言者矣

○薊遼總督文球題爲薊門虜報孔棘微臣獨力
難勝懇乞

聖明特諭撫臣視事並勅兵部嚴催已推之鎮臣
速推未補之鎮臣以共濟時艱事職至愚極
陋謬叨薊遼之役嚴

旨屢促不敢不兼程赴任職入境以來耳目所聽
覩者滿頰遍處于薊之西信信不休虎慙擾
亂于薊之東蠢蠢欲動士馬之已調者缺額
未補民兵之新到者露處無棲重地之城廓
傾頽何以壯金湯之勢到處之糧餉缺乏不
免于庚癸之呼諸如驛遞之疲累援軍之驛
騷火藥軍器之轉運無一非督屬事也有經
具題而未覆者難止望梅之渴有已經具覆
而未行者猶苦無米之炊職受事纔旬日未

悉肯繁敢上方畧唯有望廷議速定

綸音速霈奉行之唯謹已耳但任事需人無人則廢事可虞如就地方之緊要與人情之屬望者安得默默而處于此夫總督任大責重非一手一足之爲所恃以同心共濟爲

陛下修封疆者首則撫臣而鎮臣卽次之無事之時亦難偶缺况薊門何地而此時何時乎撫臣劉曰梧直節自持壯猷素著四年拮据百計焦勞凡一切夷情邊事俱是熟路輕車勿

論如職之謗劣不能望萬分之一卽職之才具果可以步後塵也然識水必問長年畢竟初試者不如久任者之明而諳于計也撫臣乞歸之疏屢上且移駐薊州似不欲一日淹者病苦固是真情封疆更屬大事北門告急之日豈長往之時乎職以爲乞歸之撫臣所當特諭視事以重邊防者也薊鎮原止一鎮臣近因逆酋犯順羣虜生心山海關外控遼內衛薊關係兩鎮咽喉三輔門戶又添一

鎮臣以彈壓之總之爲虜患方殷耳今已推
之劉渠兩月有餘尚未聞到任消息山海關
自何奮武以汝劣論褫至今竟束高閣卽求
一鎮臣且屬烏有署事未嘗乏人代庖終是
傳舍卽其人竭知殫心人亦以五日之京兆
視之以匹馬不入之地當鎮臣並缺之秋儻
一旦犬羊不戢抱鼓忽驚職飛檄而調遣之
而責成之者只此鎮臣代署之官事權不重
精神不專何以馳號令于風霆聯將士于臂
指乎職以爲已推之鎮臣所當速行會推勿
得久缺者也方今中外舌敝穎禿爲

陛下借前箸者遼事耳職不言遼而言薊非緩視
遼也遼事雖決裂可憂遼臣已籌畫無遺勿
俟職之續貂爲也况薊門料理無虞綢繆有
備內可以固根本外可以壯聲援爲薊亦所
以爲遼也職拜疏之次日便當馳赴山海而
薊門之中西兩協相距頗遠虜情叵測陰雨
當籌不得不過望于撫鎮之兩臣伏乞

皇上垂念巖疆特諭劉曰梧速出力疾視事並
勅兵部速催劉渠赴任免其交代庶料理有人而
封疆攸賴矣

○戶部尚書李汝華等題本爲遼餉計無復之臣
部勢難少待敬合詞六懇

聖明垂念封疆

宗社關繫匪輕速借帑金以解危迫事竊惟遼與
京師勢若輔車而遼之危危在封疆京師之
危危在

宗社此不待再計決者也棄遼卽以棄京師
皇上不有封疆不有

宗社又安能長有禁內之藏此亦不待再計決者
也請帑一事本都爲增兵增餉內外兼維于
萬萬不得已之時行萬萬不得已之計臣部
數爲補贖亦旣詞窮已而營臣餉臣臺省諸
臣代爲交章謂舍此莫救燃眉非爲臣部地
皆一片憂天血誠所自激發而臣等日幾望
皇上之鑒而轉圜不啻眼欲穿也乃需之愈亟持

之愈堅屢呼而屢不應得無以遼陽付之一
經臣手幸奴酋旦夕不來便保亾恙兵可無
添餉亦何用是皇皇與夫奴酋豈遂不復來
哉虎伏鷲藏搏噬愈不可測外而城守待戰
內而簡練待征添兵須臾難緩則添餉亦須
臾難緩凡言奴酋無能爲無足慮巧蔽嘗懼
如左右輩者皆誤

皇上不顧封疆

廟社者也又得無以新餉已加賦已留稅無得更
爲求多與夫臣部餉金不下三百六十萬矣
近且調遣出關者源源未絕召募入衛者攘
攘方來計日支給應費若干尚不可量值此
寒冬苦地居者卧雪裂膚行者衝風刺骨不
有挾纊之恩誰効超距之勇計人優卹應費
又若干亦不可量至海運陸運舟車脚價所
費不貲與夫厚爲懸賞購虎兎諸夷以難奴
酋未易數計此皆

皇上所穩知者約計共須七八百萬方濟目前之

急嚮使前項果足辦此臣部亦何樂瓊瑣觸
皇上之所厭迺派題留僅二百萬兩餘無論滅奴
難期卽據現前以二百餘萬之數當七八百
萬之需抑何懸絕矧新增餉銀隨到隨用已
過半矣稅銀疊徵不到猶是止渴望梅萬一
軍不宿飽脫巾以呼曰主上厚積如山計臣
胡不請發以拯我而使我至此腹心之變與
門庭之憂交構謂封疆何謂

宗社何則臣等之誤

皇上也說者謂黃白滿羸皆歛怨召亂之資卽無
事猶當出之以結民心况際此禍敗之日彼
瓊林大盈積豈不厚使漢唐兩君知聚知散
何至有甘露奉天之厄官山賦海所少非財
寧以財易天下毋以天下易財豈顧問哉

祖宗櫛風沐雨相傳二百五十年之天下
皇上幸勿自誤以誤封疆

宗社也興言及此可勝痛哭流涕此臣等忠愛難
忘復齊心以禱願徼

二祖

八宗之靈默牖

聖聰而不憚反覆前說者千懇萬懇爲

皇上今日計救急無如此着急爲之救無如此時而已儻尚食之餘稍一賜覽立沛

德音如臣所請傾大內數百萬儲蓄以佐軍糈以作敵愾匪直解臣部之危迺以自解其危從此侵疆可復將寢廟鼓鍾實嘉賴之臣與十三司官憂苦轉添顙望轉切不避忌諱同詞叩闈無任延頸待命之至

○四川道監察御史周萬鎰題爲夷氛叵測廟算甚疎人情渙散可虞國勢瀕危立見微臣目擊心駭謹罄愚衷伏乞

聖鑒以蚤速救禍亂事竊惟夷狄之患何代無之要以中國有人制禦得策故時逆時順旋起旋復卽毒或流于邊疆而禍不延于

宗社如我先朝土木之變庚戌之變勢岌岌矣然也先俺荅皆志在擄掠原無深圖而當時防

御之策亦不遺餘力斯轉危爲安也奴酋包
藏禍心在數十年之外人人知有今日迺遼
東當事諸臣徒務養癰內潰不爲曲突徙薪
旣不能預銷其萌又不能撲滅其焰坐使奴
酋強橫一入而陷撫順再入而陷清河建號
改元肆無畏忌而楊鎬李如栢等朋比爲奸
偏懷妄動使四路之師棄于一擲而奴酋益
輕中國矣今破開原鐵嶺克北關謀吞高麗
聲犯遼陽以乘勝之狡虜攻垂危之孤城恐
遼不能支而廣寧以西山海動搖

陵京震恐天下事尚忍言哉當纍卵剝膚之日
正卧薪嘗膽之時在

廟堂上宜何如悚懼何如戒備者而

皇上若罔聞也方且晏安遠處晝寢夜酣使羣臣
汎汎悠悠交相駭笑以處于無可奈何之地
夫奴勢方張必上下協謀內外齊力而後克
濟自古未有主上厭棄幾務屏絕臣工而能
收功于闕外者今之謀國抑何疎甚也職聞

王者天下之所往必上有精孚神貫之意而後下有絲聯繩繫之情必上無綱解紐弛之形而後下無鳥驚獸駭之患今臨御罕聞久習空虛之象仁賢彫謝積爲廢壞之極紀綱世道茫無着矣卽天下安所寄命乎况災異叠見訛言煩興兵招而不來民離而欲去商賈捲貲而徙宦戚避影而遁倘胡騎長驅將誰與共守京城哉恐麥秀歌于箕子黍離咏于周人也可勝慨哉語曰安危不定無爲貴聖奴酋雖強不當我一大郡縣若堂堂天朝幅幘萬里財賦萬方制奴若縛雛耳如以任之非人禦之無策一旦爲么麼小醜所困豈惟一人之憂實諸臣之罪豈惟四夷之笑實千載之羞臣言及此憂憤激衷恨不滅此朝食謹隨諸臣後妄陳一得條爲各款以仰乞聖明俯聽而採擇焉

一舉視朝之典

皇上初年勵精晷治時謹視朝故堂陛情孚魚水

邊疆威震雷霆如平哮平倭平播之役皆不
旋踵而奏功其人心有所惕也自

皇上靜攝三十年僅憑章奏一線而又多留中不
下此在平時已成鬱否况強酋壓境諸虜耽
耽譬厝火積薪而寢其上

皇上以爲安乎謂宜乘此一陽來復亟

御文華召見文武羣臣面商兵食大計共圖戰守
機宜彼羣臣從幽鬱陰霾中忽覩穆清孰不
踴躍鼓舞剖心戮力者如言可採卽見施行

使中外知

皇上無棄遼以棄天下之心自當有幡然一新宇
宙增光旌旗生色者而又行郊廟之禮齋祓
躬禱告于天地

祖宗期爲邊疆雪耻爲將士復仇誠如是則威靈
氣焰華夷震響神人協順爲滅奴第一事也
一發內帑之財自奴難以來公私俱困匱罄壘
耻今兵連而禍不解財殫而役不休始猶取
于搜括那借加派今搜無可搜借無可借加